



欽定四庫全書

子部

小說家類存目二

釋家類

釋家類存目

Handwritten note on a small paper slip.

12
130
81

十一



1157
1330
81

東學

欽定四庫全書總目卷一百四十四

所錢末
有拘邦

子部五十四

小說家類存目二

山海經釋義十八卷圖二卷

通行本

明王崇慶撰崇慶有周易議卦已著錄是書全載

郭璞註崇慶閒有論說詞皆膚淺其圖亦書肆俗

工所臆作不為典據

幽怪錄一卷續幽怪錄一卷

兩淮鹽政採進本

幽怪錄唐牛僧孺撰僧孺事蹟具新唐書本傳唐

子部 小說家類存目二

書藝文志作元怪錄朱國禎湧幢小品曰牛僧孺
撰元怪錄楊用修改為幽怪錄因世廟時重元字
用修不敢不避其實一書非刻之誤也然宋史藝
文志載李德裕幽怪錄十四卷則此名為複矣唐
志作十卷今止一卷殆鈔合而成非其舊本晁公
武讀書志云僧孺為宰相有聞於世而著此等書
周秦行紀之謗蓋有以致之也未附唐李復言續
錄一卷考唐志及館閣書目皆作五卷通考則作
十卷云分仙術感應二門今僅殘篇數頁竝不成

卷矣然志怪之書無關風教其完否亦不必深考
也

續元怪錄四卷 浙江范懋柱家天一閣藏本

唐李復言撰是書世有二本其附載牛僧孺幽怪
錄末者蓋從說郛錄出一即此本凡二十三事與
唐志卷數亦不符蓋從太平廣記錄出者雖稍多
於說郛本然亦非完帙也

龍城錄二卷 浙江巡撫採進本

舊本題唐柳宗元撰宋葛嶠始編之柳集中然唐

藝文志不著錄何遠春渚紀聞以為王銍所偽作
朱子語錄亦曰柳文後龍城錄雜記王銍之為也
子厚敘事文字多少筆力此記衰弱之甚皆寓古
人詩文中不可知者於其中似暗影出今觀錄中
所載帝命取書事似為韓愈調張籍詩天官遣六
丁雷電下取將二句作解趙師雄羅浮夢事似為
蘇軾梅花詩月下縞衣來扣門作解朱子所論深
得其情莊季裕作雞肋編乃引此錄駁金華圖經
季裕與銍為同時人或其書初出偽迹未露故不

暇致詳歟然自南宋以來詞賦家已沿為故實不
可復廢是亦王充所謂俗語不實流為丹青者矣

獨異志三卷

江蘇巡撫採進本

唐李冗撰唐藝文志作李冗未詳孰是其書雜錄
古事亦及唐代瑣聞大抵語怪者居多如女媧兄
妹為夫婦事皆齊東之語又如列子海人狎鷗愚
公移山事皆摭寓言為實事尤為膠固至王涯為
仇士良所害本非文宗之命乃稱涯為天兵梟戮
則悖謬甚矣

陸氏集異記四卷

兩江總督採進本

舊本題唐比部郎中陸勳撰書錄解題及宋史藝文志竝作二卷陳振孫曰語怪之書也凡三十二事言犬怪者居三之一此書較陳氏所載多二卷而事較振孫所記之數多三凶倍亦不多言犬怪豈後人附會非其本書歟

劍俠傳二卷

江蘇巡撫採進本

舊本題為唐人撰不著名氏載明吳瑄古今逸史中皆紀唐代劍俠之事與太平廣記一百九十三

卷至一百九十六卷所載豪俠四卷文盡相同次序及句下夾註如潘將軍條下所附忘其名疑為潘鵠碑也九字亦復昭合但譌鵠碑為鶴碎耳蓋明人勦襲廣記之文偽題此名也

錄異記八卷

兩江總督採進本

蜀杜光庭撰光庭有了證歌已著錄此書宋志作十卷與今本異白雲霽道藏目錄收於洞元部記傳類恭字號中然光庭雖道士而此書所述實無與於道家卷首沈士龍題辭謂光庭以方術事蜀

孟昶故成此書以取悅考陶岳五代史補光庭以唐僖宗幸蜀時入道其後歷事王建王衍未入後蜀卽以此書而論其記蜀丁卯年會昌廟城壕側龜著金書王字大吉字則王建天復七年也又稱蜀皇帝乾德元年己卯七月十五日庚辰降誕廣聖節王彥徽得白龜以進則王衍元年也凡此皆為前蜀王氏誕陳符瑞以云悅昶失考甚矣其言皆荒誕不足信治城客論曰廣成先生杜光庭撰仙傳錄異等書率多自作故人有無稽之言謂之

杜撰然則光庭之妄前人已言之矣

括異志十卷

內府藏本

舊本題宋張師正撰師正字不疑熙甯中為辰州帥文獻通考載師正擢甲科後宦遊四十年不得志於是推變怪之理參見聞之異得二百五十篇魏泰為之序此本不載魏序蓋傳寫佚之然王銍默記以是書卽魏泰作蓋泰為曾布之婦兄而銍則曾紆之壻猶及識泰其言當不誣也

青瑣高議前集十卷後集十卷

兩淮鹽政採進本

不著撰人名氏晁公武讀書志及宋史藝文志皆著錄亦皆不云誰作趙與峇賓退錄稱爲劉斧青瑣高議當必親見其標題前有孫副樞序不稱名而舉其官他書亦無此例其爲里巷俗書可知也所紀皆宋時怪異事蹟及諸雜傳記多乖雅馴每條下各爲七字標目如張乖崖明斷分財回處士磨鏡題詩之類尤近於傳奇閒有稱議曰者寥寥數言亦多陳腐讀書志稱其詞意鄙淺良非輕詆公武所錄作十八卷宋史藝文志亦同此本乃多

兩卷或坊賈傳刻又有所竄入歟蔡條鐵圍山叢談稱所載孫勔射龍被追見韓琦爲紫府真人事其說不謬然稱爲青瑣小說或又其別名也孫勔事魏公別錄魏公家傳皆載之周煇清波雜誌又考其同異謂當以家傳爲正其所引王老志別一說卽蔡條語也韓琦名德何必死作閻羅王乃足取重斧作小說侈談神怪可矣士大夫以爲實事而記於家傳別錄好事者又校正其異同相率說夢不亦偵乎

雲齋廣錄八卷後集一卷

內府藏本

宋李獻民撰獻民字彥文延津人是書前有政和辛卯獻民自序所載皆一時豔異雜事文既冗沓語尤猥褻晁公武讀書志陳振孫書錄解題俱云十卷分九門今止存六門曰士林清話曰詩話錄曰靈怪曰麗情曰奇異曰神仙共八卷末有後集一卷曰盈盈傳乃作者自述所遇然首稱皇祐中中稱嘉祐五年皆仁宗年號與獻民時代不相及則傳中所謂余者乃別一人而佚其名非獻民自

稱也其書大致與劉斧青瑣高議相類然斧書雖俗猶時有勸戒此則純乎誨淫而已以向來諸家著錄今姑存其目焉

五色線二卷

內府藏本

不著編輯者名氏載毛晉津逮祕書中考中興館閣書目有此書名然是書雜引諸小說新誕之語或不紀所出割裂舛謬不可枚舉至謂楚襄王夢神女事出史記其庸妄可知未知果宋時舊本否也

峽山神異記一卷

永樂大典本

宋黃輔撰輔里籍未詳是書作於嘉定戊寅輔時辟為瀧水縣令自序謂予備員西征始聞峽山非常可駭之事始猶未敢以為然及觀前賢所記由東坡以來連篇累牘悉出於名公巨卿之口以其人之可信則事必可信矣訪峽山集舊版散失於是哀集傳之然其敘述飛來殿謂至德元年峽有三神人化為方士夜扣穎州貞俊禪師曰本峽居清遠上流吾欲建道場師能去否俊諾之是夕風

雨驟作黎明薄霽啟戶而觀則佛殿與神像已運至山中矣俊師乃於峯前石上安坐本淮南西路舒州延祚寺之所移其事涉於語怪是小說之支流非地志之正體也

閒窻括異志一卷

浙江鄭大節家藏本

宋魯應龍撰自署東湖蓋嘉興人書中稱淳祐甲申館於沈氏則理宗時也其書皆言神怪之事而多借以明因果前半帙皆所聞見後半帙則雜採古事以足之大半與唐五代小說相出入

浙江巡撫採進本

金元好問撰好問字裕之號遺山太原人官至左
司郎中事蹟具金史本傳是編蓋續宋洪邁夷堅
志而作所紀皆金泰和貞祐閒神怪之事前有自
序見於遺山集而此本無之蓋傳寫佚脫也

異聞總錄四卷

內府藏本

不著撰人名氏亦不著時代其中林行可一條稱
大德丁酉則元人矣然所載臨安倡女儀珏一條
稱其編隸鄱陽予嘗於席閒與紙筆即賦詞大略

美吾兄弟有鄱江英氣鍾三秀之語乃洪邁夷堅
志原文所謂予者即邁所謂弟兄三秀即邁适遵
也此本勦襲其言併其自稱亦未改則亦剽剗而
成者矣

效顰集三卷

兩淮鹽政採進本

明趙弼撰弼有雪航膚見已著錄是編皆紀報應
之事意寓勸懲而詞則近於小說第三卷中闕疥
鬼對夢遊番陽傳二篇殆傳寫佚之

談纂一卷

浙江鮑士恭家藏本

明都穆撰穆有壬午功臣爵賞錄已著錄是書記錄元明以來逸事然多涉神怪不足徵信書中龔泰軒輓張仙三條註稱采曰者乃其門人陸采附記蓋此書采所編次故原本題曰都公談纂云

陸氏虞初志八卷

浙江范懋柱家天一閣藏本

舊本題陸氏虞初志不著其名惟第一卷中續齊諧記有跋稱得於外舅都公家疑為都穆壻也其書所收諸家小說惟吳均為梁人餘皆唐人雜傳不出太平廣記之中殊乏異聞白猿傳舊題江總雖曰託名然既為謗歐陽詢而作則出於隋末唐初更無疑義乃以殿唐末未免失倫則亦隨手鈔合取足卷帙無所詮次之本矣

志怪錄五卷

兩淮鹽政採進本

明祝允明撰允明有蘇材小纂已著錄是編所載皆怪誕不經之事觀所著野記諸書記人事尚多不實則說鬼者可知矣朱孟震河上楮談謂允明所作志怪凡數百卷疑無此事卷字殆條字之誤歟

西樵野記四卷

兩淮鹽政
採進本

明侯甸撰。甸蘇州人。明史藝文志載是書作十卷。此本卷數不符。疑有散佚。然原序稱一百七十餘條。計數無闕。或明史誤也。序又稱所載悉幽怪之事。此本所載乃有不涉幽怪者二十三條。為例未免不純。其女子咏錢一詩。見沈括筆談。撫為近事。尤疎舛矣。

廣夷堅志二十卷

兩江總督
採進本

舊本題明楊慎撰。慎有檀弓叢訓已著錄。是編前

有嘉靖二十年慎門人夏林序文詞猥陋舛誤。出如云宋洪邁有夷堅志二十卷。考邁書甲集至癸集二百卷。支甲至支癸一百卷。三甲至三癸一百卷。四甲四乙二十卷。乃四百二十卷。非二十卷也。又稱因宣和皇帝喜長生不死之術。一時士大夫相習成風。爭為此類言語。以媚於上。洪故賢者亦不能免。考邁乃高宗紹興十五年進士。孝宗時官端明殿學士。非徽宗宣和時人也。又稱慎著述已滿天下。晚年學莊子之卮言。拾齊諧之剩語。仿

洪氏之例而推廣之考慎以正德六年辛未登第
年二十四至嘉靖二十年辛丑僅五十四歲非晚
年也其為依託已無疑義及核其書乃全錄樂史
廣卓異記一字不異可謂不善作偽矣

見聞紀訓一卷

兩江總督
採進本

明陳良謨撰良謨字中夫安吉人正德丁丑進士
官至貴州布政司參政是書雜記見聞多陳因果
雖大旨出於勸戒而語怪者太多

耳鈔祕錄一卷

浙江巡撫
採進本

舊本題上元壬午南贍部洲二十八年林之東無
名氏撰述考書中所紀其人當在嘉靖時壬午即
嘉靖元年而稱二十八年其詞詭誕未之詳也所
紀皆明代雜事然無一非委巷之談如謂明成祖
發劉基之墓得一朱匣中有賀永樂元年登極表
元順帝為明所敗匿於古寺而死即以寺梁為棺
甯王權為許遜後身邱濬為蝦蟆精凡孔氏襲衍
聖公者其相必口露雙齒如孔子明太祖以公主
嫁朝鮮國世子劉基對明太祖稱白鬚子變紅鬚

子明孝宗為牟尼佛降生故年號上下二字皆取
牟字字頭其鄙俚荒唐殆不足與辯至於以危素
為姓魏以于謙為姓余殆市井略識字人妄聽之
而妄記之不知何以得傳至今也

高坡異纂二卷

江西巡撫
採進本

明楊儀撰儀有螭頭密語已著錄是編乃志怪之
書前有自序謂高坡者京邸之寓名案明張爵坊
巷衚衕集東城有高坡衚衕蓋卽所居也錢希言
繪園稱楊儀禮部素不信元怪之談因聞王維賢

親見仙人騎鶴事始遂傾心著有高坡異纂行於
世然書中所記往往誕妄如黃澤為元末通儒趙
汭之所師事本以經術名家而儀謂劉基入石壁
得天書從澤講授真可謂齊東之語至謂織女渡
河文曲星私窺其媒狎織女誤牽文曲星衣上帝
醜之手批牽牛頰傷眉流血竟公然敢於侮天矣
小說之誕妄未有如斯之甚者也

冶城客論二卷

浙江范懋柱家
天一閣藏本

明陸采撰采字子元長洲人粲之弟也是編乃其

肄業南雍時記所聞見大抵妖異不根之言其胡銓後身一條云聞之祝允明又云初聞祝子之言以為祝好奇必記此不暇詳叩因近閱語怪兩編無之追書於冊是允明有所不記而采記之其誕更甚於允明矣乃譏沈周作客座新聞多信門客妄言何也卷末鴛鴦記一篇述施氏婦閨幽會之事淫媠萬狀如身歷目睹此同時士大夫家也誰見之而誰言之乎尤有乖名教矣

祐山雜說一卷

兩淮鹽政採進本

明馮汝弼撰汝弼字惟良平湖人嘉靖壬辰進士官工科給事中以言事謫潛山縣丞遷知太倉州調揚州府同知不赴隆慶中追贈布政司參政是書自記生平瑣事率涉夢卜禳祥其所記他人事亦多不出此末載種植數方尤與全書不類

古今奇聞類記十卷

兩淮鹽政採進本

明施顯卿撰顯卿字純甫無錫人嘉靖壬子舉人官新昌縣知縣是書成於萬歷丙子分天文地理五行神祐前知凌波奇遇驍勇降龍伏虎禁蟲除

妖馘毒物精仙佛神鬼十六門兼及明代近事頗取史傳而掇拾稗官小說者為多

二酉委談一卷 兩淮鹽政採進本

明王世懋撰世懋有卻金傳已著錄此編乃隨筆雜記多說神怪之事亦閒作放達語蓋其時山人習氣漸染及於士大夫也卷頁頗寥寥其西山雲霧茶一條云追憶夜來風味書一通以贈先生 案生指蔡琳泉也五月十二日歸自郡城一條云坐心遠堂中命筆伸紙作數行記之萬歷十二年一條云第

三子士駮年十三書此付之三月晦日一條云歸而記之以示兩兒殆平時所作雜帖其後人錄之為帙歟

燃犀集四卷 通行本

不著撰人名氏自稱茂苑樹瓠子有嘉靖辛酉自序摘取小說家所錄神怪之事彙錄成編大都與他書複出無可採也

異林十六卷 河南巡撫採進本

明朱睦㮮撰睦㮮有易學識遺已著錄此乃摘百

家雜史中所載異事分為四十二目頗為雜糅如防風雋僥之類世所習聞不足稱異而他書稍僻者仍不無挂漏惟詳註所出書名在明末說家中體例差善耳

快雪堂漫錄一卷

浙江巡撫採進本

明馮夢禎撰夢禎有歷代貢舉志已著錄是編為陸烜奇晉齋所刻皆記見聞異事語怪者十之三語因果者十之六記翰林舊例大同米價回回人義僕節婦虞長孺漢印吳茂昭品龍井茶李于鱗

棄芥茶以及栽蘭藏茶炒茶茉莉酒造印色鑄鏡造糊造色紙諸法為雜家言者十之一故從其多者八之小說家焉

孝經集靈一卷

編修程晉芳家藏本

明虞淳熙撰淳熙字長孺錢塘人萬歷癸未進士官至吏部稽勳司郎中經義考載淳熙有孝經邇言九卷今文孝經說一卷今皆未見此書專輯孝經靈異之事如赤虹化玉之類故曰集靈夫釋氏好講福田尚非上乘況於闡揚經義而純用神怪

因果之說乎其言既不詁經未可附於經解退居
小說庶肖其真至其採錄顛舛如張角作亂向詡
上便宜不欲國家興兵但遣將於河上北向讀孝
經則賊當自消滅一條乃嗤鄙之事古來傳以為
笑者亦收為靈蹟殆信為賊果消滅乎

前定錄二卷

浙江鮑士恭家藏本

明蔡善繼編善繼字伯達烏程人萬歷辛丑進士
官至福建左布政使其書皆載古來前定之事上
卷凡七十八事下卷凡九十三事前有善繼自序

後有泉州府訓導張啓睿跋細核所錄乃全剽太
平廣記第一百四十六卷至第一百六十卷定數
一門之文名姓次序一字無異惟上卷之末增延
陵包隰一人下卷之首增寶易直至劉逸二十八
為原書所無然亦自廣記他門移掇竄入者廣記
為習見之書乃取其中十五卷別立書名攘為己
有作偽之拙於是極矣

仙佛奇蹤四卷

內府藏本

明洪應明撰應明字自誠號還初道人其里貫未

詳是編成於萬歷壬寅前二卷記仙事後二卷記佛事首載老子至張三丰六十三人名曰消搖墟末附長生詮一卷次載西竺佛祖自釋迦牟尼至般若多羅十九人中華佛祖自菩提達摩至船子和尚四十二人曰寂光境末附無生訣一卷仙佛皆有繪像殆如兒戲考釋道自古分門其著錄之書亦各分部此編兼採二氏不可偏屬以多荒怪之談姑附之小說家焉

獮園十六卷

浙江巡撫採進本

明錢希言撰希言有戲瑕已著錄是書成於萬歷癸丑皆記當時神怪之事一仙幻二釋異三影響四報緣五冥蹟六靈祇七淫祀八奇鬼九妖孽十瓌聞其以獮園名書者獮者狡獮之意狡獮者戲弄之意也其中記陳祖臯陷冤獄出金資營救反為人所給事影響類中作其姻家錢日省因其從子朗生誘祖臯妻鏹三百緡及金鳳釵諸物為沈儒宗所脅致敗祖臯妻死而為厲靈祇類中作指揮采成文構成其獄因其同里沈瑞徵誘祖臯母

鏹六百緡後瑞徵獨匿其賂成文無所得因陷祖
皇大辟祖皇父與郊為厲兩卷之中姓名事迹自
相矛盾記所見如是記所聞者可知矣

耳新十卷

兩淮鹽政
採進本

明鄭仲夔撰仲夔有蘭畹居清言已著錄是書雜
記瑣事多及仙鬼因果亦輟耕錄之流亞中記魏
忠賢事蓋明末人也

王氏雜記十四卷

浙江巡撫
採進本

明王兆雲撰兆雲有詞林人物考已著錄是編凡

湖海搜奇二卷揮塵新談二卷白醉璣言二卷說
圃識餘二卷漱石閒談二卷烏衣佳話四卷皆雜
記新異之事本各自為書後人哀為一帙總題曰
王氏雜記非其本名也其中烏衣佳話明史藝文
志作八卷此本僅前後二集每集分上下卷或為
合併或為闕佚均不可知然志怪之書無關學問
其完否亦無容深考惟其中記張孚敬晚遇一條
謂廷臣議追封大禮拘於俗說濮園之非云云則
意存左袒不為公論有不可不糾正者耳

燕山叢錄二十二卷

浙江巡撫採進本

明徐昌祚撰昌祚字伯昌常熟人是編蓋其官刑部時所作多載京畿之事故以燕山爲名凡分二十二類大抵多涉語怪未附以長安里語尤爲鄙俚又多失其本字本音不足以資考證書成於萬歷壬寅有昌祚自序謂因輯太常寺志得徵州縣志書因採其所記成此書則亦剽掇之學也

芙蓉鏡孟浪言四卷

浙江巡撫採進本

明江東偉撰東偉字青來自號壺公開化人萬歷

丙午舉人其書分元部幻部靈部幽部爲四集皆摘錄諸書神仙鬼怪之事各系評語而佻纖殊甚如幻部中載張南軒晚得奇疾沒時就殮通身透明腑臟筋骨歷歷可數瑩徹如水晶云云本說部無稽之談東偉乃爲之評曰此明明德之本體可謂無所不戲侮矣其曰孟浪言者蓋取莊子齊物篇語殆亦自知其不經歟

敝帚軒刺語三卷補遺一卷

兩淮鹽政採進本

明沈德符撰德符有飛鳧語略已著錄是書雜記

神怪俳諧事多猥鄙至記林潤劾嚴世蕃論死世蕃為厲鬼以報潤則又顛倒是非之甚矣

耳談十五卷

安徽巡撫探進本

明王同軌撰同軌字行父黃岡人由貢生官江甯縣知縣其書皆纂集異聞亦洪邁夷堅志之流每條必詳所說之人以示徵信則用蘇鶚杜陽雜編之例前有陶冶序稱其事不必盡核理不必盡合文不必盡諱亦小說家之定評也然其中推重方士陶仲文稱漫加削奪時論大乖則其他曲筆諒

多矣

聞見錄一卷

浙江鄭大節家藏本

明姚宣撰宣字懋昭應天人是書所記雜事多涉神怪舊事則註出某書新事則註聞之某人而序述冗拙亦或失於詮次如祿薄儉常足官卑廉自尊一聯一以為正德閒浙江巡檢題一以為洪武中御史劉子敏左遷侯官典史時題一頁之中相隔三行而復出兩條可知其雜鈔無緒也

逸史搜奇

無卷數 兩江總督探進本

明汪雲程編雲程徽州人其書雜採漢唐迄宋小說一百四十種彙為一編中分十集大抵皆猥鄙

荒怪之語

四明龍蒼一卷

兩淮鹽政採進本

明聞性道撰性道有賀監記略已著錄是書專載四明諸井潭神龍見伏靈蹟紀錄寥寥惟所載蜥蜴考一篇於蠨螋蝮蟻蠃等名辨證詳審然紀四明龍事而汜濫及之於體裁亦未協也

才鬼記十六卷

浙江鮑士恭家藏本

明梅鼎祚撰鼎祚字禹金宣城人嘗作三才靈記一為才神記一為才幻記一即此書所載上自周下至明代末二卷則箕仙之語皆從諸小說探出然如左傳所載渾良夫夢譟之詞偶成韻語目以才鬼似乎未然又如搜神記之段孝直水經注之鮮于冀但有辨枉之詞亦不得以才論至搜神記之劉伯文寄一家書即謂之才尤為非理小說家語怪之書汗牛充棟鼎祚招拾殘賸以成是編本無所取義而體例龐雜又如是真可謂作為無益

矣

蚶菴瑣語一卷

大學士英廉購進本

國朝李王邁撰王邁字肱枕嘉興人是編記明末及國初見聞皆其鄉里中事大抵語怪者多末述屠象美陳梧據嘉興作亂始末及白頭賊之事頗詳

矩齋雜記二卷

江西巡撫探進本

國朝施閏章撰閏章仕履已附見青原志略條下是書多記見聞雜事兼涉神怪舊載閏章外集中蓋

河東集後附龍城錄之例然終為不類今析出別著錄焉

冥報錄二卷

大學士英廉購進本

國朝陸圻撰圻有新婦譜已著錄此編皆記冥途因果之事意主勸善其真妄不可究詰也

雷譜一卷

浙江巡撫探進本

國朝金侃撰侃字亦陶吳縣人其書雜錄雷之典故與雷之果報雖意主戒惡而所摭皆小說家言

史異纂十六卷

浙江巡撫探進本

國朝傳燮詞撰燮詞字去異靈壽人工部尚書維麟
子官至汀州府知府是書雜纂災祥怪異之事自
上古至元悉據正史採八凡外傳雜記皆不錄分
天異地異祥異人異事異術異譯異鬼異物異雜
異十門

有明異叢十卷

浙江巡撫採進本

國朝傅燮詞撰是書記明一代怪異之事亦分十類
與史異纂門目相同皆從小說中撮鈔而成漫無
體例如尹蓬頭騎鐵鶴上升正德中上蔡知縣霍

恩為流賊所殺頭出白氣及天啟丙寅王恭厥災
之類往往一事而兩見又有實非怪異而載者如
事異門內胡壽昌毀延平淫祠而絕無妖任高妻
女三人罵賊沒水次日浮出面如生術異門內汪
機以藥治狂癩物異門內蕭縣岳飛祠內竹生花
雜異門內漳州火藥局災大石飛去三百步之類
皆事理之常安得別神其說至如譯異門內謂黑
婁在嘉峪關西近土魯番其地山川草木禽獸皆
黑男女亦然今土魯番以外咸入版圖安有是種

類乎其妄可知矣

觚賸八卷續編四卷浙江巡撫採進本

國朝鈕琇撰琇字玉樵吳江人康熙壬子拔貢生歷官至陝西知府是編成於康熙庚辰皆記明末

國初雜事隨所至之地錄其見聞凡吳觚三卷燕觚

豫觚秦觚各一卷粵觚二卷續編成於康熙甲午

分類排纂為言觚事觚人觚物觚四卷體例與初

編略殊各有琇自序琇本好為儷偶之詞故敘述

是編幽豔悽動有唐人小說之遺然往往點綴敷

衍以成佳話不能盡核其實也

曠園雜志二卷大學士英廉購進本

國朝吳陳琰撰陳琰有春秋三傳同異考已著錄是

書皆記見聞雜事而涉神怪者十之七八惟所記

楊維垣偽題樞字棄城夜遁為劫盜所殺非死於

國事及葬明莊烈帝始末二事足備考證耳

述異記三卷大學士英廉購進本

舊本題東軒主人撰不著名氏所記皆順治末年

康熙初年之事多陳神怪亦間及奇器觀其述江

村雜記一條其人尚在高士奇後也

鄢署雜鈔十四卷

浙江巡撫
採進本

國朝汪為熹撰為熹字若木桐鄉人康熙末官鄢陵知縣欲修縣志而未果因撫其地之遺聞瑣事綴為此書自序稱事涉鄢陵者十之六七涉省郡別州縣者十之三四合以身之所歷目之所觀得十四卷大抵多採稗官說部一切神怪之言蓋本儲地志之材而繙閱既多摭撫遂濫又嗜奇愛博不忍棄去乃哀而成帙別以雜鈔為名是特說部之

流非圖經之體也今存目於小說家中庶從其類至卷首冠以康熙五十二年

覃恩敕命莫喻其理殆見唐宋文集有以告身冠集首者故亦效之歟不知彼乃後人所加非所自編又皆施於專集非施於筆記之類也

果報見聞錄一卷

大學士英
廉購進本

國朝楊式傳撰式傳字雪岷鄞縣人是編皆述善惡之報而大旨歸心於二氏其逆婦小善免死一條雖意主戒殺然婦欲殺姑罪通於天矣豈偶救數

鳥之命卽可以贖乎殆不可訓也

信徵錄一卷

大學士英廉購進本

國朝徐慶撰慶字賓溪自署曰烏山人不知何地之烏山也是編雜記果報語多荒誕夫福善禍淫天有顯道卽明神胥蠶亦當在杳冥之間至於人鬼對言幽明相接指陳獄牘判決是非如虞山孫振先竊銀因果記之類何其怪而不經也命曰信徵豈其然乎

見聞錄一卷

大學士英廉購進本

國朝徐岳撰岳字季方嘉善人是編皆記怪異之事亦夷堅睽車之流

簪雲樓雜記一卷

大學士英廉購進本

國朝陳尚古撰尚古字雲瞻德清人是編雜記瑣聞多涉語怪其足資考證者惟述魏忠賢養女任氏冒稱明熹宗皇后張氏一事耳

右小說家類異聞之屬六十部三百五十二卷

內一部無

卷數皆附存目

笑海叢珠一卷

永樂大典本

子部小說家類存目二

子部小說家類存目二

三

舊本題唐陸龜蒙撰然書中有蘇軾黃庭堅僧了元及黨進事龜蒙生於唐末何得預知其為妄人依託可知矣

牡丹榮辱志一卷

內府藏本

舊本題宋邱璿撰考宋邱璿字道源黟縣人天聖五年進士官至殿中丞邵博聞見後錄記當時有邱濬者以易卦推驗歷代謂元豐正當豐卦靖康要錄記欽宗以郭京為將蓋取邱濬詩郭京楊式劉無忌皆在東南臥白雲之讖其字皆從睿從水

此本亦題曰字道源蓋即其人而名乃作璿殆傳寫誤歟尤侗明藝文志乃以是書為明邱濬作又誤中之誤矣厲鶚宋詩紀事稱濬有洛陽貴尚錄今未見此書亦品題牡丹以姚黃為王魏紅為妃而以諸花各分等級役屬之又一一詳其宜忌其體略如李商隱雜纂非論花品亦非種植入之農家為不倫今附之小說家焉

東坡問荅錄一卷

內府藏本

舊本題宋蘇軾撰所記皆與僧了元往復之語詼

諧謔浪極為猥褻又載佛印環疊字詩及東坡長亭詩詞意鄙陋亦出委巷小人之所為偽書中之至劣者也

漁樵閒話二卷 內府藏本

舊題宋蘇軾撰明陳繼儒刻入普祕笈中名為漁樵閒話錄案晁公武讀書志中有此書作漁樵閒話無錄字公武又云設為問荅及史傳雜事不知何人所為亦不言出自軾手書中多引唐小說議論皆極淺鄙疑宋時流俗相傳有是書而明人重

刻者復假軾以行耳

開顏集二卷 浙江范懋柱家天一閣藏本

宋周文玘撰文玘嘗官試祕書省校書郎其里籍未詳此書通考作三卷此本僅上下二卷而所載三十五事與自序合疑通考誤二為三也文玘通考作文規書錄解題謂文規未知何人然此刻本玘字甚分明亦疑通考傳寫之誤其書皆古來談諧事各註出典然其中如世說濟尼一條無可笑者列子攫金一條增吏大笑之四字後漢書袁隗

婦一條增隗大笑之四字皆非本文亦一病也

談諧一卷

兩淮鹽政採進本

宋陳日華撰日華不知何許人文獻通考載所著金淵利術八卷亦不著時代別有詩話一卷中引朱子之語考姜夔白石詩集有陳日華侍兒讀書詩又張端義貴耳集稱淳熙間有二婦人足繼李易安之後曰清菴鮑氏秀齋方氏秀齋即陳日華之室則孝宗時人也所記皆俳優嘲弄之語視日華所作詩話尤為猥雜然古有笑林諸書今雖不

盡傳而太平廣記所引數條體亦如此蓋小說家有此一格也

諧史一卷

編修程晉芳家藏本

舊本題宋沈俶撰俶始末未詳書中載有趙師巽為臨安尹時事則嘉定以後人矣所錄皆汴京舊聞以多詼嘲之語故名曰諧史其載吳興項羽廟事謂鬼神之於人但侮其命之當死及衰者又謂魑魅罔兩假羽名以興禍福所論頗正然與書名殊不相應疑亦後人雜鈔成編也

古今諺一卷 永樂大典本

宋周守忠撰守忠有養生雜纂已著錄是編前有自序稱略以所採之編採摘古今俗語又得近時常語雖鄙俚之詞亦有激諭之理漫錄成集名古今諺古諺多本史傳今諺則鄙俚者多矣

滑稽小傳二卷 永樂大典本

一名滑稽逸傳不著撰人名氏自序稱烏有先生亦借司馬相如之語非其本號也序稱史記特為滑稽立傳以俳諧之中自有箴諷是以取之余遊

士大夫閒街談巷語輒取而書之然所載皆毛穎傳容成侯傳之類大抵寓言無事實也

笑苑千金一卷 永樂大典本

舊本題張致和撰致和未詳何許人中一條稱周益公罷相云云則亦南宋時人也

醉翁滑稽風月笑談一卷 永樂大典本

不著撰人名氏其書首條為二勝環刺高宗不迎徽欽又有韓信娶三秦之諺以刺秦檜蓋亦南宋人所為

文章善戲一卷

兩淮馬裕家藏本

元鄭持正撰倣韓愈毛穎傳例於筆墨紙硯悉加封號而擬為制表之詞又益以宋无文房十八學士制吳必大歲寒三友無腸公子除授集鄭楷擬封花王冊而張敏頭責子羽文沈約脩竹彈甘蕉文諸篇亦附載焉末有元統元年古雍樊士寬後序一首謂集文房茶具圖贊羅氏十夫八仙為一卷簽曰房闈羣珍刻之介然堂與書名不相應未詳何故也

拊掌錄一卷

編修程晉芳家藏本

舊本題元人撰不著名氏後有至正丙戌華亭孫道明跋亦不言作者為誰說郭載此書題為宋元懷前有自序稱延祐改元立春日驟然子書蓋元懷自號也此本見曹溶學海類編中失去前序遂以為無名氏耳書中所記皆一時可笑之事自序謂補東萊呂居仁軒渠錄之遺故目之曰拊掌錄云

古杭雜記詩集四卷

浙江汪啓淑家藏本

不著撰人名氏皆載宋人小詩之有關事實者各為詳其本末如本事詩之例目錄末有題識云已上係宋朝遺事一新繡梓求到續集陸續出售與好事君子共之其書目又別題一依廬陵正本六字蓋元時江西書賈所刊也所記凡四十九條多理宗度宗時嘲笑之詞不足以資考核案陶宗儀說郛內亦載有是書題作元李東有撰然與此本參較僅首二條相同餘皆互異未喻其故觀書首標題殆古杭雜記為總名而詩集為子目乃其全

書之一集非完帙也

玉堂詩話一卷

永樂大典本

不著撰人名氏所採皆唐宋人小說隨意雜錄不拘時代先後又多取鄙俚之作以資笑噱此諧史之流非詩品之體故入之小說家焉

埤雅廣要二十卷

內府藏本

明牛衷撰衷里貫未詳官蜀府護衛千戶蜀王以陸佃埤雅未為盡善令衷補正為此書然佃雖以引用王安石字說為陳振孫等所譏而其博奧之

處要不可廢表所補龐雜餽殆不成文甚至字
謎小說雜然竝載為薦紳之所難言乃輕詆佃書
殊不知量今退而列於小說家俾以類從表序所
稱蜀王不著其名考明史諸王年表蜀和王悅啟
以宣德十年進封薨於天順五年表序為天順元
年作則王當為悅啟審矣

十處士傳一卷

浙江巡撫
探進本

明支立撰立字中夫嘉興人天順中官翰林院孔
目是編乃其為常州學官時作取布衾木枕紙帳

蒲席瓦爐竹牀杉几茶一甌燈檠酒壺十物仿毛穎
傳例各為之姓名里貫蓋冷官游戲消遣日月之
計未有自跋稱初為九傳夜夢酒壺詬爭乃補為
十則滑稽太甚矣

蓬窗類記五卷

浙江范懋柱家
天一閣藏本

明黃暉撰暉字日昇號東樓吳縣人宏治庚戌進
士官至刑部郎中此書雜記舊事上自朝廷典故
下及談諧鬼怪之屬無所不錄分功臣紀科第紀
賦役紀國初紀妖人紀災異紀異人紀厚德紀政

續紀忠烈紀高士紀異行紀固介紀穎慧紀德怨
 紀節婦紀著作紀詩話紀技藝紀冠衲紀夢紀果
 報紀滑稽紀怪異紀黠盜紀祛惑紀商販紀釋冤
 紀諸目所載吳事尤多然頗蕪雜不盡可據前有
 王鏊序稱故友黃君少攻舉業未甚賅洽及筮仕
 乃始汎觀博取此書所紀雖不能無猥瑣而崇正
 之意亦寓其閒可謂得是非之公矣

博物志補二卷

兩江總督採進本

明游潛撰潛字用之豐城人宏治辛酉舉人官雲

南賓川知州是編補張華之書體例略如李石所
 續而猥雜冗濫無一異聞又出石書之下

古今文房登庸錄一卷

浙江巡撫採進本

明黃謙撰謙江甯人昔曹植鯀表加以爵位為俳
 諧遊戲之祖嗣後作者日繁曼衍及於諸物宋林
 洪有文房圖贊一卷元羅先登又為圖贊續一卷
 各繫以職官名號此書因而衍之所擬諸文更加
 徵拜詔贊諸名陳陳相因皆做精神於無用之地
 者也

香奩四友傳二卷

編修勵守謙家藏本

明陸奎章撰奎章字子翰武進人前四友曰金亮木理房施白華乃鏡梳脂粉也後四友曰周準齊銛金貫索紉乃尺剪針線也蓋仿韓愈毛穎傳而作後附偶人說一篇皆詞意儂薄了無可取蓋明初淳實之風至是已漸漓矣

居學餘情三卷

浙江巡撫採進本

明陳中州撰中州字洛夫青田人宏治中由貢主官廬江縣教諭初號太鶴山人久而落拓不得志

占得九悔之象復自號亢惕子佯狂恣肆蕩然於禮法之外嘗琢石為冠刻太極兩儀五行八卦之象是編首載其圖并繫以詩有圈子不須龍馬背老夫頭上頂羲皇之句其妄誕可想其餘諸篇亦皆踵毛穎革華之窠臼無非以游戲為文雖曰文集實則小說故今存其目於小說家焉

古今諺二卷古今風謠二卷

浙江汪啓淑家藏本

明楊慎編是書採錄古今謠諺各為一編然賈子及太公兵法引黃帝語自屬巾机銘之遺文或列

子所謂黃帝書者不得謂之為諺且是書成於嘉靖癸卯即載正德嘉靖時諺然則慎自造數語亦可入之矣此蓋久居成所借編錄以遺歲月不足以言著書其孫宗吾誤刻之耳

黎洲野乘

無卷數 浙江范懋柱家天一閣藏本

明舒纓撰纓字振伯餘姚人嘉靖乙未進士官王府長史是書乃其遊戲之作為太極氏本紀者一為性書學書者二為歲月日時表者四為悅翁愚隱君何有先生遁盜魚言達觀居士中虛子浣公

等列傳者八皆仿史例為之蓋欲仿莊列之寓言實則詞旨淺陋尚遠出革華諸傳下也

六語三十卷

浙江鮑士恭家藏本

明郭子章編子章有蟻衣生易解已著錄是編凡謠語七卷諺語七卷讖語二卷識語六卷譏語一卷諧語七卷皆雜採諸書為之頗足以資談柄而所錄明代近事往往猥雜蓋嗜博之過失於剪裁也

廣滑稽三十六卷

浙江巡撫採進本

子部 小說家類存目二

三七

明陳禹謨編禹謨有經籍異同已著錄是編採掇諸書瑣事雋語不分門目仍以原書為次第仿曾慥類說之例其原書久佚僅從他書所引哀輯數條仍標原目則仿陶宗儀說郛例也

諧史集四卷

兩淮鹽政採進本

明朱維藩編維藩淮安人是書成於萬歷乙未取徐常吉諧史賈三近滑稽耀編刪削補綴共為一集凡明以前遊戲之文悉見採錄而所錄明人諸作尤為猥雜據其體例當入總集然非文章正軌

今退之小說類中俾無溷大雅據其自序稱題於豫章官署則非遊食山人流也讀聖賢之書受民社之寄而敝精神於此種明末官方士習均可以睹矣

古今寓言十二卷

兩淮馬裕家藏本

明陳世寶撰世寶字介錫鉅鹿人萬歷中官監察御史巡按江西其書鈔撮諸家文集中託諷取譬之作分十二類體近俳諧頗傷猥雜

廣諧史十卷

內府藏本

明陳邦俊編邦俊字長卿秀水人先是徐常吉嘗採錄唐宋以來以物為傳者七十餘篇彙而錄之名曰諧史邦俊因復為增補得三百四十餘首夫寓言十九原比諸史傳之滑稽一時游戲成文未嘗不可少資諷諭至於效尤滋甚面目轉同無益文章徒煩楮墨搜羅雖富亦難免於疊牀架屋之譏矣

清異續錄三卷

編修程晉芳家藏本

明李琪枝撰琪枝字雲連號奇峰嘉興人李肇亨

之子李日華之孫書中卯色天一條稱先太僕有詩云云囊雲一條稱先岡卿越仕江州司理被讒拂衣云云畫隱一條稱黃魯直詩李侯畫隱百僚底岡卿用下五字鐫一圖記自作畫則識之云云皆指日華也是書續陶穀清異錄而作穀書皆載唐末五代近事此則皆採古書穀書分三十七門此則併為天文地理君道官志君子女行么麼釋族仙宗人事詞苑藝能肢體居室衣服粧飾陳設十七門女行之末又附載婦女雙名一門體例頗

不相同而採摭故事或佚脫其出典或舛誤其字
句如開卷天笑一條出東方朔神異經人人習見
而題曰莊子四雨一條自是詩話而入之天文舊
雨一條本出杜甫集而註曰白孔六帖影娥池本
出洞冥記而註曰三輔黃圖蕊女一條引關尹子
是也而又引漢童謠河閒蕊女工數錢句不知續
漢志實作姦女蝦蟆更一條據郎瑛七修類彙指
為宋事而不知唐張泌詩已有蝦蟆更急海城寒
句先載蜀章穀才調集中是雖蒐羅實事轉不如

陶穀之多構虛詞矣

小窗自紀四卷豔紀十四卷清紀五卷別紀四卷

內府藏本

明吳從先撰從先爵里未詳自紀皆俳諧雜說及
游戲詩賦詞多儂薄豔紀採錄漢至明雜文分體
編錄踏駁殊甚清紀摹仿世說分清語清事清韻
清學四門別紀兼涉志怪總明季纖詭之習也

豆區八友傳一卷

兩淮鹽政採進本

國朝王著撰蒼字宓草秀水人以製造菽乳其名有
八因呼八友各為寓名而傳之蓋游戲之小品後

有胡奉衡跋題己卯年蓋其書成於崇禎十二年也

筆史二卷

兩淮鹽政採進本

國朝楊忍本撰忍本字因之南城人其書內編一卷分原始定名屬籍結撰効用膺秩寵遇引退考成九門外編一卷分徵事上下及述贊三門大旨由韓愈毛穎傳而推衍之雜引典故鈔撮為書不以著作論也

青泥蓮花記十三卷

兩淮鹽政採進本

明梅鼎祚撰是編記倡友之可取者分七門一曰記禪二曰記元三曰記忠四曰記義五曰記孝六曰記節七曰記從又附外編五門一曰記藻二曰記用三曰記豪四曰記遇五曰記戒自謂寓維風於諧末奏大雅於曲終然狹斜之遊人情易溺懲戒尚不可挽回鼎祚乃拈瑣瑣聞謂冶蕩之中亦有節行使倚門者得以藉口狎邪者彌為傾心雖意主善善從長實則勸百而諷一矣

板橋雜記三卷

大學士英廉購進本

子部

小說家類存目二

四

國朝余懷撰懷字無懷號澹心閩縣人自明太祖設官伎於南京遂為治遊之場相沿謂之舊院此外又有珠市亦名倡所居明季士氣儂薄以風流相尚雖兵戈日警而歌舞彌增懷此書追述見聞上卷為雅遊中卷為麗品下卷為軼事文章悽縟足以導欲增悲亦唐人北里志之類然律以名教則風雅之罪人矣

右小說家類瑣語之屬三十五部二百二十七卷內一部皆無卷數皆附存目

欽定四庫全書總目卷一百四十四

番禺王國瑞初校順德馮佐助覆校

欽定四庫全書總目卷一百四十五

子部五十五

釋家類

梁阮孝緒作七錄以二氏之文別錄於末隋書遵用其例亦附於志末有部數卷數而無書名舊唐書以古無釋家遂併佛書於道家頗乖名實然惟錄諸家之書為二氏作者而不錄二氏之經典則其義可從今錄二氏於子部末用阮孝緒例不錄經典用劉昫例也諸志皆道先於

釋然魏書已稱釋老志七錄舊目載於釋道宣
廣宏明集者亦以釋先於道故今所敘錄以釋
家居前焉

宏明集十四卷 兵部侍郎紀昀家藏本

梁釋僧祐編僧祐姓俞氏彭城下邳人初出家揚
都建初寺武帝時居鍾山定林寺唐書藝文志載
僧祐宏明集十四卷此本卷數相符蓋猶釋藏之
舊未有僧祐後序而首無前序疑傳寫佚之所輯
皆東漢以下至於梁代闡明佛法之文其學主於

戒律其說主於因果其大旨則主於抑周孔排黃
老而獨伸釋氏之法夫天不言而自尊聖人之道
不言而自信不待夸不待辨也恐人不尊不信而
囂張其外以彌縫之是亦不足於中之明證矣然
六代遺編流傳最古梁以前名流著作今無專集
行世者頗賴以存終勝庸俗緇流所撰述就釋言
釋猶彼教中雅馴之言也

廣宏明集三十卷 兵部侍郎紀昀家藏本

唐釋道宣撰道宣姓錢氏丹徒人隋末居終南白

泉寺又遷豐德寺淨業寺至唐高宗時乃卒持戒精苦釋家謂之宣律師唐志載廣宏明集三十卷與此本合然二十七卷以後每卷各分上下實三十四卷也其書續梁僧祐宏明集而體例小殊分爲十篇一曰歸正二曰辨惑三曰佛德四曰法義五曰僧行六曰慈濟七曰戒功八曰啟福九曰悔罪十曰統歸每篇各爲小序大旨排斥道教與僧祐書相同其中如魏書釋老志本於二氏神異各有紀錄雖同爲粉飾而無所抑揚道宣乃於敘釋

氏者具載其全文敘道家者潛刪其靈蹟然則冤親無等猶爲最初之佛法迨其後世味漸深勝負互軋雖以叢林古德人天瞻禮如道宣者亦不免於門戶之見矣其書採摭浩博卷帙倍於僧祐如梁簡文帝被幽述志詩及連珠三首之類頗爲泛濫然道宣生隋唐之間古書多未散佚故墜簡遺文往往而在如阮孝緒七錄序文及其門目部分儒家久已失傳隋志僅存其說而此書第三卷內乃載其大綱尚可推尋崖略是亦禮失求野之一

端不可謂無裨考證也神僧傳稱僧祐前身為南齊剡溪隱嶽寺僧護道宣前身即為僧祐殆因道宣續僧祐之書故附會是說又稱道宣卒於乾封二年而書末有遊大慈恩寺詩乃題高宗之諡殊不可解又註曰一作唐太宗蓋知其牴牾為之遷就考雍錄載慈恩寺貞觀二十二年高宗在春宮時為文德皇后立則太宗猶及見之然大慈恩之名可以出高宗之口不可以出太宗之口殆原本題為御製後人追改歟

法苑珠林一百二十卷

大理寺卿陸錫熊家藏本

唐釋道世撰道世字元暉上都西明寺僧是書成於高宗總章元年朝散大夫蘭臺侍郎隴西李儼為之序稱事總百篇勒成十帙此本乃一百二十卷蓋百篇乃其總綱書中則約略篇頁而分卷帙如千佛篇十惡篇則一篇分七八卷善友篇惡友篇擇交篇則兩三篇共一卷故書凡一百一十八卷而目錄二卷亦入卷數與陸德明經典釋文例同合之共為百二十也每篇各有述意如史傳之

序子目之首則或有述意或無述意爲例不一大旨以佛經故實分類排纂推明罪福之由用生敬信之念蓋佛法初興惟明因果暨達摩東邁始啓禪宗譬以六經之傳則因果如漢儒之訓詁雖專門授受株守師承而名物典故悉求依據其學核實而難誣禪宗如宋儒之義理雖覃思冥會妙悟多方而擬議揣摩可以臆測其說憑虛而易騁故心印之教既行天下咸避難趨易辨才無礙語錄日增而腹笥三藏之學在釋家亦幾乎絕響矣此

書作於唐初去古未遠在彼法之中猶爲引經據典雖其閒荒唐悠謬之說與儒理抵牾而要與儒不相亂存之可考釋氏之掌故較後來侈談心性彌近理大亂真者固尚有閒矣

開元釋教錄二十卷

江西按察使王昶家藏本

唐釋智昇撰智昇開元中居長安西崇福寺是編以三藏經論編爲目錄不分門目但以譯人時代爲先後起漢明帝永平十年丁卯迄開元十八年庚午凡六百六十四載中間傳經緇素總一百七

十六人所出大小二乘三藏聖教及聖賢集傳并及失譯總二千二百七十八部合七千四十六卷分爲二錄一曰總括羣經錄皆先列譯人名氏次列所譯經名卷數及或存或佚末列小傳各詳其人之始末凡九卷其第十卷則載歷代佛經目錄凡古目錄二十五家僅存其名新目錄十六家具列其數首爲古經錄一卷謂爲秦始皇時釋利防等所齋其說恍惚無徵次爲舊經錄一卷稱爲劉向校書天祿閣所見蓋依據向列仙傳序稱七十

二人已見佛經之文至稱爲孔壁所藏則無庸置辨矣餘自漢時佛經目錄以後則固皆有實徵者也一曰別分乘藏錄凡爲七類一曰有譯有本二曰有譯無本三曰支派別行四曰刪略繁重五曰拾遺補闕六曰疑惑再譯七曰僞邪亂真則各以經論類從州列部分與總錄一經一緯凡八卷其第十九卷則大乘經律論入藏目錄第二十卷則小乘經律論聖賢集傳入藏目錄也佛氏舊文茲爲大備亦茲爲最古所列諸傳尤足爲考證之資

朱彝尊作經義考號為善本而核其體例多與此符或為規仿或為闡合均未可定然足見其為編流之中爛於著作者矣考隋書載王儉七志以道佛附見合為七門阮孝緒七錄則以佛錄第六道錄第七共為七門隋志則於四部之末附載道經佛經之總數而不列其目唐志以下頗載經目而挂漏實多今於二氏之書皆擇體裁猶近儒書者略存數家以備參考至經典敘目則惟錄此書及白雲靈道藏目錄以存梗概亦猶隋志但列總數

之意云爾

宋高僧傳三十卷

內府藏本

宋釋贊甯撰贊甯有筍譜已著錄是書乃太平興國七年奉太宗敕旨編撰至端拱元年十月書成遣天壽寺僧顯忠等於乾明節奉表上進有敕獎諭賜絹三十匹仍令僧錄司編入大藏而宋史藝文志不著錄蓋史志於外教之書粗存梗概不必求全於例當然亦於理當然也高僧傳之名起於梁釋惠敏分譯經義解兩門釋慧皎復加推擴分

立十科至唐釋道宣續高僧傳蒐輯彌博於是分
譯經義解習禪明律護法感通遺身誦讀興福雜
科十門所載迄唐貞觀而止贊甯此書蓋又以續
道宣之後故所錄始於唐高宗時門目亦一仍其
舊凡正傳五百三十三人附見一百三十八人傳後
附以論斷於傳授源流最爲賅備中間如武后時
人皆系之周朝殊乖史法又所載旣託始於唐而
雜科篇中乃有劉宋元魏二人亦爲未明限斷然
其於誄銘記志摭採不遺實稱詳博文格亦頗雅

瞻考釋門之典故者固於茲有取焉

法藏碎金錄十卷

內府藏本

宋晁迥撰迥有昭德新編已著錄迥受學於王禹
偁以文章典瞻擅名而性耽禪悅喜究心於內典
是編乃天聖五年退居昭德里所作皆融會佛理
隨筆記載蓋亦宗門語錄之類其曰碎金取世說
新語安石碎金義也孫覲謂其宗向佛乘以莊老
儒書彙而爲一蓋嘉祐治平以前濂洛之說未盛
儒者沿唐代餘風大抵歸心釋教以范仲淹之賢

而手製疏文請道古開壇說法其他可知迴作是書蓋不足異南宋初年迴五世孫公武作郡齋讀書志乃附載迴道院集後列之別集門中殊爲不類殆二程以後諸儒之辨漸明公武旣不敢削其祖宗之書不著於錄又不肯列之釋氏貽論者口實進退維谷故姑以附載回護之觀其條下所列僅敘迴仕履始末行誼文章而無一字及本書其微意蓋可見矣然自阮孝緒七錄以後釋氏之書久已自爲一類歷朝史志著錄竝同不必曲爲推

崇亦不必巧爲隱諱今從陳振孫書錄解題人之釋氏類中存其實也其書傳本頗稀明嘉靖乙巳迴裔孫翰林院檢討堞始從內閣錄出鈔版以行改其名曰迦談殊爲無謂今仍從迴原名著於錄焉

道院集要三卷

兩淮馬裕家藏本

舊本題爲道院集宋晁迥撰宋史藝文志載道院集要三卷註曰不知作者考晁公武讀書志載道院別集十五卷稱五世祖文元公撰文元卽迥諡

也又別載道院集要三卷稱元祐中侍從王古編併載古序曰文元晁公博觀內書復勤於著述其書曰道院別集曰自擇增修百法曰法藏碎金曰隨因紀述曰耄智餘書余嘗徧閱之以爲名理之妙雖白樂天不逮也輒刪去重複總集精粹以便觀覽則此書乃王古選錄迴書故名集要舊本以爲卽道院集者誤也文獻通考列之別集門中今檢其書乃語錄之流實非文集改隸釋家庶不失其旨焉

僧寶傳三十二卷

安徽巡撫探進本

宋釋惠洪撰惠洪有冷齋夜話已著錄禪宗自六祖以後分而爲二一日青原其下爲曹洞雲門法眼一日南岳其下爲臨濟潯仰是爲五宗嘉祐中達觀曇穎嘗爲之傳載其機緣語句而略其終始行事惠洪因綴輯舊聞各爲之傳而系以贊凡八十一人前有寶慶丁亥臨川張宏敬序稱舊本藏在廬阜後失於回祿錢塘風篁山僧廣遇慮其湮沒因校讎鋟梓然卷末題明州府大慈名山教忠

報國禪寺住持比丘寶定刊版又似刻於四明者疑爲重鈔之本也陳氏書錄解題作三十卷文獻通考作三十二卷蓋原書本三十卷後有補禪林僧寶傳一卷又有臨濟宗旨一卷共爲三十二卷臨濟宗旨亦惠洪所撰補禪林僧寶傳題舟峯菴僧慶老蓋亦北宋人也

林閒錄二卷後集一卷

浙江巡撫採進本

宋釋惠洪撰晁公武讀書志稱是書所記皆高僧嘉言善行然多訂贊甯高僧傳諸書之譌又往往

自立議論發明禪理不盡敘錄舊事也前有大觀元年謝逸序稱惠洪與林閒勝士抵掌清談每得一事隨卽錄之本明上人以其所錄析爲上下二帙刻之於版是其書乃惠洪劄記而本明爲之編次者文獻通考作四卷以原序上下二帙之語證之殆通考字誤歟後集一卷載惠洪所作贊偈銘三十一首漁父詞六首逸序未言及之不知何人所附人也惠洪頗有詩名其所著作多援引黃庭堅諸人爲重然喜遊公卿閒初以醫術交結張商

英復往來郭天信之門政和元年張郭得罪遂連
坐決配朱厓又吳曾能改齋漫錄記其作上元宿
嶽麓寺詩有十分春瘦緣何事一掬鄉心未到家
句爲蔡卞之妻所譏有浪子和尚之目則既役志
於繁華又溺情於綺語於釋門戒律實未精嚴在
彼教中未必遽爲法器又書中載杜衍張詠同居
睢陽事晁公武讀書志嘗辨其疎胡應麟筆叢亦
稱其載杜衍呼張詠爲安道安道乃張方平字非詠之
字益證其所記之誣蓋與所作冷齋夜話同一喜

作妄語然所作石門文字禪釋家收入大藏又普
濟五燈會元亦多採此書蓋惠洪雖僧律多疎而
聰明特絕故於禪宗微義能得悟門又素擅詞華
工於潤色所述釋門典故皆斐然可觀亦殊勝粗
鄙之語錄在佛氏書中固猶爲有益文章者矣

五燈會元二十卷

內府藏本

宋釋普濟撰普濟字大川靈隱寺僧也其書取釋
道原景德傳燈錄駙馬都尉李遵勗天聖廣燈錄
釋維白建中靖國續燈錄釋道明聯燈會要釋正

受嘉泰普燈錄撮其要旨彙爲一書故曰五燈會元以七佛爲首次四祖五祖六祖南嶽青原以下各按傳法世數載入焉蓋禪宗自慧能而後分派滋多有良价號洞下宗文偃號雲門宗文益號法眼宗靈祐慧寂號漚仰宗義元號臨濟宗學徒傳授幾徧海內宗門撰述亦日以紛繁名爲以不立語言文字爲不二法門實則輻輳紛紜愈生障礙蓋唐以前各尊師說儒與釋爭宋以後機巧日增儒自與儒爭釋亦自與釋爭人我分而勝負起議

論所以多也是書刪掇精英去其冗雜敘錄較爲簡要其考論宗系分篇臚列於釋氏之源流本末亦指掌瞭然固可與僧寶諸傳同資釋門之典故非諸方語錄掉弄口舌者比也

羅湖野錄四卷

浙江鮑士恭家藏本

宋釋曉瑩撰曉瑩字仲溫江西人頗解吟咏其南昌道中一律載宋高僧詩選中紹定閒釋紹嵩作江浙紀行詩廣集唐宋名句曉瑩亦與焉則在當時亦能以詞翰著也是書卷首有紹興乙亥自序

謂以倦遊歸憩羅湖之上因追憶昔所聞見錄爲四卷其中多載禪門公案及機鋒語句蓋亦林閒錄之流而縉徒故實紀述頗詳所載士大夫投贈往來篇什尤夥遺聞逸事多藉流傳亦頗有資於談柄未有紹興庚辰後跋一首不署姓名而跋中自稱曰妙總則亦僧作也近厲鶚撰宋詩紀事多採此書然如普首座詩取其別衆絕句而山居一絕反不見錄則鶚所摭摭尚未盡其菁華矣

釋氏稽古略四卷

編修注如藻家藏本

元釋覺岸撰覺岸字寶洲烏程人其書皆敘述釋氏事實用編年之體以歷代統系爲綱而以有佛以來釋家世次行業爲緯始於太昊庖犧氏終於南宋瀛國公德祐二年初名稽古手鑑旣以所載尚未賅備復因舊輯而廣之始改今名書成於至正初中山李恆爲之序覺岸記誦該博故所錄自內典以外旁及雜家傳記文集志乘碑碣之類多能搜採源流派別詳贍可觀惟於列朝興廢盛衰絕無關於釋氏者亦復分條摘列參雜成文未免

傷於枝贅且據藏經所記佛生於周昭王九年既欲甄敘宗門自當斷以是歲為始顧乃侈談邃古遠引洪荒於體例亦為汜濫又唐代紀年於昭宣帝後別有少帝濮王紉一代謂為朱全忠所立年號天燾旋復被鳩求之正史全無事實尤不知其何所依據然其援據既富亦頗有出自僻書足資考證者其於叢林古德記蒞流傳亦多攷覈詳明備徵典故錄存其說未始非緇林道古之一助也

佛祖通載二十二卷

兩淮鹽政探進本

元釋念常撰念常姓黃氏號梅屋華亭人延祐中居嘉興大中祥符禪寺是編前有至正元年虞集序所敘釋氏故實上起七佛下迄元順帝元統元年皆編年紀載念常於至治癸亥嘗驛召至京師繕寫金字佛經因受法於帝師帕克巴原作發合思巴今改正是以卷首七佛偈後即繼以帕克巴所撰彰所知論又所謂莊嚴劫賢劫不知當中國何年不能編次故盤古以至周康王但略存帝王統系自周昭王二十五年釋迦牟尼佛誕生以後始據內典編

年每條之後多附論斷大旨主於侈神異陳罪福起人敬畏之心以自尊其教然知儒者之禮樂刑政必不可廢故但援儒入墨與闢佛者力爭而仍尊孔子又知道家清淨與佛同源故但攻擊齋醮章呪服餌修鍊之術而仍尊老子其論唐憲宗懿宗之迎佛為崇奉太過論王縉杜鴻漸但言福業報應故人事置而不修為泥佛太過亦時能自彌其罅漏其立言頗巧至韓愈為一代偉人乃引西蜀龍氏之書詆其言行悖戾扎木楊喇勒智原作楊璉

真伽窮凶極惡乃沒其事迹但詳述其談禪之語竟儼然古德宗風尤不免顛倒是非不足為據然念常頗涉儒書在緇流之中較為賅洽於佛教之廢興禪宗之授受言之頗悉於唐以來碑碣誌傳之類採掇尤詳亦足以資考訂其黨同伐異負氣鬪爭乃釋道二氏之通例心知其意置而不論可也
右釋家類十三部三百十二卷皆文淵閣著錄

釋家類存目

迦談四卷

浙江巡撫採進本

宋晁迥撰迥有昭德新編已著錄是編即迥法藏碎金錄也明代久無傳本嘉靖乙巳其裔孫璫以翰林院檢討兼管誥敕得此編於內府而刻之改題此名前載迥逸事數條及璫所為跋跋稱十卷與宋志合此本止四卷蓋又佚闕矣

佛祖統紀五十四卷

浙江巡撫採進本

宋僧志磐撰志磐咸淳中住四明東湖是書詳載天台一宗源流其凡例稱政和中僧元穎作宗元錄慶元中吳克已作釋門正統嘉定閒僧景遷因

克已之書作宗源錄嘉熙初僧宗鑑又取釋門正統重修之志磐以其皆未盡善乃參取諸書撰為此編以諸佛諸祖為本紀八卷以諸祖旁出為世家二卷以諸師作列傳十三卷又作表二卷志三十卷全仿正史之例大旨以教門為正脈而蓮社淨土及達摩賢首慈恩灌頂南山諸宗僅附見於志斷斷然分門別戶不減儒家朱陸之爭至所稱上稽釋迦示生之日下距法智息化之年一佛二十九祖通為本紀以繫正統如帝王正寶位而傳

大業如謂已超方外則不宜襲國史之名如謂仍在寰中則不宜擬帝王之號雖自尊其教然僭已甚矣

武林西湖高僧事略一卷

浙江巡撫探進本

宋僧元敬元復同撰初西湖僧了性探自晉至宋高僧卓錫錢塘者二十四人建閣祀之功未竟而去元敬嗣歲其事因屬東嘉僧元復撫二十四人行實為此書後又續得六人元敬補為傳贊寶祐丙辰吳郡莫子文為之序

神僧傳九卷

通行本

不著撰人名氏焦竑國史經籍志載此書卷帙相符亦不云誰作所載始於漢明帝時摩騰法蘭終於元世祖時國師帕克巴凡二百八人蓋元人所撰帕克巴傳稱大德七年卒皇慶閒追號大覺普惠廣照無上帝師則書成於仁宗以後也二百八人中宋僧僅十六人十六人中北宋十三人南宋僅三人似為北僧所著然遼金竟無一人又不知其何意矣大旨自神其教必有靈怪之蹟者乃載

故以神僧爲名而諸方古德談禪持律者則槩不錄焉

大藏一覽十卷

內府藏本

明陳實原編實原甯德人始末未詳是編以藏經浩繁難於尋覽因錄其大要括爲一書分八門六十品系以因緣一千一百八十一則

覺迷蠡測三卷剩言一卷附錄一卷

浙江巡撫採進本

明管志道撰志道有孟義訂測已著錄是編皆闡發佛理前有自序稱江陽段侯幻然子傳來一剞

詢大覺起迷之生相及老釋差殊之教相俱是儒書率性修道以上事不容不答亦不忍不答乃草勒數款而命之曰覺迷蠡測末有瞿汝稷題語其剩言一卷皆闡發此書餘義附錄一卷則與諸人往返論禪書也

法喜志三卷

浙江巡撫採進本

明夏樹芳撰樹芳有棲真志已著錄是編取歷代知名之人據其一事一語近乎佛理者皆謂得力於禪學凡二百餘人至於韓愈程子周子朱子亦

羅織入之姚江末派至明季而橫流士大夫無不以心學爲宗故有此援儒入墨之書以文飾其謬可謂附會不經前有萬歷六年顧憲成序憲成所見必不如是殆亦樹芳嫁名耳

長松茹退二卷

浙江孫仰曾家藏本

明釋可真撰可真字達觀吳江人世號紫柏大師始居蘇州楞嚴寺既而游大房石經進隋僧淨琬所藏佛舍利慈聖太后迎入宮中特賜紫伽黎俄以獄詞牽連論死著有茹退集是書乃其別撰語

錄閒及物理不盡爲釋氏之言惟其以茹退爲名殊不可解李日華六研齋筆記稱佛經以牛糞爲茹退其名甚新其自謙之詞歟然謙亦不應至此或別有取義也

吳都法乘十二卷

兩淮鹽政採進本

明周永年撰永年有鄧尉聖恩寺志已著錄是書皆輯吳中釋氏典故分十二篇

正宏集一卷

編修周永年家藏本

國朝釋本果撰本果字曠園潮州靈山寺僧是編皆

述唐僧大顛事迹而大旨主於誣韓愈歸依佛法以伸彼教首列寺圖次爲元大德辛丑僧了性所作大顛本傳次爲韓愈與大顛三書次爲歐陽修別傳跋次爲虞集別傳贊次爲諸家詩文而終以本果自跋據朱子韓文考異以與大顛書爲真而陳振孫書錄解題力辨其僞且言其因仍方崧卿所編外集之誤然崧卿所作韓集舉正今尚有淳熙舊刻考其外集所列二十五篇之目實無此三書疑不能明也愈與大顛往返事見與孟簡書中

而所傳大顛別傳卽稱簡作其爲依託灼然可見韓文考異亦引之不知何所證驗考陳善捫蝨新話引宗門統要所載憲宗詰愈佛光及愈皈依大顛屢參不悟事一一與此書相合宋史藝文志載宗門統要十卷僧宗永所撰蓋緇徒造作言語以復闢佛之讎不足爲怪至儒者亦採其說則未免可訝矣

南宋元明僧寶傳十五卷

浙江巡撫採進本

國朝釋自融撰其門人性磊補輯始自宋建炎丁未

至

國朝順治丁亥凡五百二十一年採錄共九十七人
不載禪門宗系人自為傳竝系之以贊蓋續宋僧
惠洪所撰僧寶傳也

現果隨錄一卷

大學士英廉購進本

國朝僧戒顯撰戒顯字悔堂順治閒居杭州靈隱寺
是編凡九十一則每則附以論斷皆陳善惡之報
而大旨歸於持戒奉佛懺除惡業仍彼教之說而
已

右釋家類十二部一百一十七卷皆附存目

欽定四庫全書總目卷一百四十五

番禺陳起榮初校
番禺陳慶修覆校

12